

# Guan Eng perlu lebih positif, realistik - Penganalisis ekonomi

**KUALA LUMPUR** 2 Jun- Mempertahankan imej dan melindungi negara daripada persepsi buruk antara tanggungjawab besar yang dipikul oleh setiap Menteri Kewangan.

Perkara itu dinyatakan penganalisis ekonomi daripada Putra Business School Universiti Putra Malaysia (UPM), Prof. Madya Dr. Abu Sofian Yaacob apabila mengulas mengenai maklumat hutang dan liabiliti kerajaan berjumlah RM1.1 trilion setakat akhir 2018 oleh Menteri Kewangan, Lim Guan Eng semalam.

Baginya jika kedudukan hutang tidak dijelaskan secara berhati-hati, keadaan itu berisiko memberi gambaran bahawa kerajaan banyak berhutang dan mampu mempengaruhi minat pelabur terhadap Malaysia.

Katanya, walaupun kerajaan menggunakan perakaunan terakru, pengiraan hutang perlu berdasarkan kepada angka sebenar, kerana mengambil kira liabiliti lain yang bukan secara langsung hutang kerajaan tidak mencerminkan kedudukan kewangan semasa.

"Pada dasarnya, Malaysia

mempunyai ekonomi yang stabil dan pengurusan kewangan yang agak baik. Selama ini Malaysia mampu menguruskan hutangnya.

"Menteri Kewangan, Lim Guan Eng perlu membuat pembentangan yang lebih positif dan realistik. Sebarang pengumuman daripada Menteri Kewangan akan memberi kesan secara langsung dan tidak langsung kepada pelabur-pelabur luar negara dan domestik," katanya kepada *Utusan Malaysia* di sini hari ini.

Sejak berlaku pertukaran parti pemerintahan pada Mei 2018, kerajaan Pakatan Harapan (PH) mengamalkan pengiraan hutang yang turut merangkumi liabiliti luar jangka termasuk jaminan kerajaan, pembayaran pajakan dan bayaran penyelenggaraan sehingga menyebabkan hutang mencecah RM1 trilion.

Pengiraan itu mendapat tentangan pembangkang yang menganggap kiraan hutang oleh



**DR. ABU SOFIAN YAACOB**

kerajaan Barisan Nasional (BN) sebelum ini adalah mengikut piawaian Tabung Kewangan Antarabangsa (IMF).

Kata Abu Sofian, gambaran bahawa kerajaan terlalu banyak berhutang dikhawatir boleh menyebabkan Malaysia akan dipandang sama seperti

negara-negara yang berdepan isu kewangan antaranya Venezuela, Greece, Zimbabwe serta Sri Lanka.

"Kita tidak mahu memberi tanggapan bahawa pelaburan di Malaysia kurang menarik dan berisiko. Menteri kewangan mempunyai tanggungjawab besar untuk menjaga perjalanan pentadbiran negara dan kesejahteraan rakyat," katanya.

Tambahnya, kerajaan mencari kaedah untuk mengutip cukai yang sepatutnya dikutip kerana dilaporkan masih ramai lagi yang tidak membayar cukai atau kurang membayar cukai pendapatan.